



Responsabels, acturas ed acturs dil teater el liber «Sut igl ischi – il teater».

FOTO MAD

«Nus lein render honor a quei giubileum»

Trun ei semtgau per commemorar il giubileum da 600 onns dalla renovaziun dalla Ligia Grischa. Cun in teater el liber, concerts, produziuns audiovisualas, exposiziuns d'art e historia vegn purschiu in program pulpiu e variont duront plirs meins. La partenza egl onn giubilar vegn fatga sonda da Pastgas cun in act festiv el curtgin d'honor sper la baselgia da s. Onna e silsunter el Museum sursilvan Cuort Ligia Grischa.

HANS HUONDER/FMR

Dapi treis onns lavuran in comite directiv e gruppas da lavur vid il project «Sut igl ischi 2024.» Per possibilitar in vast program da teater, musica, cant, art e historia ha la vischnaunca da Trun sbursau in credit da 850 000 francs. Sustenus finanzielmeins vegn il project d'ulteriuras varts, denter auter dil cantun Grischun. «Jeu hai grond plascher da quei program e che nus savein dar l'entschatta sonda proxima», di il president communal *Dumeni Tomaschett* ch'ei era alla testa dall'organisaziun dalla fiasta.

La fiasta sa entscheiver

Sonda, ils 30 da mars 2024 allas 14.00 ei igl act festiv per l'entschatta dil giubileum da 600 onns dapi la renovaziun dalla Ligia Grischa a Trun. El curtgin d'honor sper la baselgia da s. Onna e sut igl ischi vegn seregurdau dalla Ligia Grischa. La brev dils 16 da mars 1424 che sigilescha quella renovaziun dalla Ligia Grischa ei dil reminent da veser ell'exposiziun speciala davart la historia dalla ligia el Museum sursilvan Cuort Ligia Grischa. Leu ha liug sonda proxima la secunda part digl arranschament da partenza egl onn festiv (mira boxa).

Ad ina conferenza da medias ch'ils organisateurs han arranschau la mesjamna avonmiezdi ha la gerava da cultura *Erica Cavegn-Pfister* puntuau: «Nus lein render honor a quei giubileum. Per quei motiv lavura bia gliued dapi quater onns vid in program fetg variont. Essenzials ei era il grond diember da voluntaris, senza lur lavur fuss ina tala fiasta buca realisabla.»

Ligia Grischa sin viadi

Igl emprem punct da program ei il concert dalla Societad da musica Trun ensemen cun *Alexi* e *Marcus*. Per quei concert ha *Corsin Tuor* arranschau entgins classichers dils dus cantauturs romontschs cun accumpnament da brass. Als dus concerts presenta la musica era la

«Legenda rumantscha», il toc dalla Fiasta da musica cantunala 2024 a Claustra. El rom da 600 onns Ligia Grischa sePRESENTA il Chor Ligia Grischa, dirigiut da *Christoph Cajöri*, en quater loghens. Sco il coordinatur dils arranschaments da giubileum, *Roland Cajacob* di, fa il chor quei en fuorma d'in viadi historic cun canzuns e texts prelegi dil historicher *Adolf Collenberg*. Quels extracts historics sestendan sco in muossavia tras il program dils concerts en loghens da muntada per la Ligia Grischa.

Igl ischi survegn ina vusch

In ulteriur accent musical d'aula qualitad ei il program «détgas e fatgas d'ina perdetga metta». Sut la direziun da *Clau Scherrer* sePRESENTAN il Chor cecilian Trun, Cantus Firmus e scolaras e scolaras dalla Scola da musica Surselva ensemen culla Filharmonia dil Grischun treis ga. Il cudisch e la reschia meina *Gieri Venzin*, *Lorenz Dangel* ha cumponiu las ovras. «Igl ei aschidadir ina produziun multimediala cun cant e musica. Jeu sun carschius si 150 meters spegl ischi, mo hai stuiu constatar ch'jeu savevel pauc dalla historia da quel e dalla Ligia Grischa», di *Clau Scherrer*. El selegri sin quellas produziuns cun musica, cant e raquens informativs: «Entras las canzuns survegn igl ischi ina vusch.» Ed el constatescha: «D'udir ei era in'interpretaziun dall'emprena canzun davart igl ischi e quella ei ord la plema da pader *Placidus* a *Spescha*.» Tematisadas en quella produziun vegnan era las fiastas tschentenaras dalla Ligia Grischa da 1824 e 1924.

Il teater el liber

Sil prau sut la baselgia parochiala da s. Martin a Trun vegn la «cuedia seriusa» presentada en fuorma d'in teater el liber. 350 personas han plaz silla tribuna, il maletg dalla culissa che vegn procuraus da *Patrick Rothmund* duei mussar il contuorn culla baselgia da s. Onna ed igl ischi. Autur dil toc «Sut igl ischi – il teater» ei *Michel Decurtins*. *Mario Pacchioli*

ei responsabels per la musica e *René Schnoz* per la reschia. «Il teater gioga el temps dad oz cun risguard dalla historia dalla Ligia Grischa», di la meinaproduziun dil teater *Esther Berther*. Il toc sefatschenta da plirs aspects: Tgei succeda sch'ina vischnaunca piarda si'identitad e siu spért da cuminonza ni tgi sa oz aunc mobilisar forzas per defender l'autonomia, il plascher e la luschezia d'esser ina cuminonza che decida libramein? 24 acturas ed acturs e 40 personas davos las culissas ein engaschadas vid quei project.

Fiasta da cant ed exposiziuns

Parallelmeins sper las festivtads da 600 onns Ligia Grischa organisescha il Chor cecilian Trun la 46avla Fiasta da cant districtuala dalla Surselva. 32 chors cun rondund 1000 cantaduras e cantadurs separticipeschan a quella. Essenzialmeins contribuescha era il Museum sursilvan Cuort Ligia Grischa vid la festivtad. Sco la presidenta dalla Fundaziun Cuort Ligia Grischa, *Justina Simeon* di, ha la vernissascha da duas purschidas liug questa sonda. Igl ei in'exposiziun speciala davart la historia dalla Ligia Grischa. Quella cuntegn documents ed ina revista da maletgs che muossa il decours d'in di dils delegai dalla Ligia Grischa pli baul ella Cuort Ligia Grischa en fuorma d'in giug auditiv. Igl ei il di da s. Gieri 1698. Il curatur *Beat Gugger* ha concepiu quell'exposiziun che presenta era documents historics sco per exempel la brev per la renovaziun dalla Ligia Grischa ils 16 da mars 1484. In'otra exposiziun ei dedicata agl art e porta il tetel «grisch».

Art il pli different da 16 artistas ed artists ord il territori dall'antieriura Ligia Grischa ei exponius en pliras stanzas dalla Cuort Ligia Grischa. In'ulteriura exposiziun ella Cuort Ligia Grischa muossa ils portrets dils causligia ch'eiin perpetuisai ella sala dils causligia cun lur uoppens. Las exposiziuns ella Cuort Ligia Grischa vegnan accumpnadas cun in vast program d'arranschaments entochen igl october.



Il president communal *Dumeni Tomaschett* e la gerava da cultura *Erica Cavegn-Pfister* ella sala dils causligia ella Cuort Ligia Grischa. Els selegran sill'entschatta dil program da 600 onns Ligia Grischa che vegn lantschus questa sonda.

FOTO HANS HUONDER

«Sut igl ischi 2024» a Trun:

- **30 da mars 2024:** Entschatta dalle festivtads el curtgin d'honor sper la baselgia da s. Onna ed el Museum sursilvan Cuort Ligia Grischa.
- **20 e 21 d'avrel:** Concerts dalla Societad da musica Trun ensemen cun *Marcus* ed *Alexi*.
- **27 d'avrel entochen 5 da matg:** Concerts dil Chor Ligia Grischa a Trun, Mesauc, Glion e Domat.
- **8 entochen ils 14 da zercladur:** «Détgas e fatgas d'ina perdetga metta» cul Chor cecilian Trun, Cantus Firmus, scolaras e scolaras dalla Scola da musica Surselva en cooperaziun culla Filharmonia dil Grischun.
- **15 da zercladur:** 46avla Fiasta da cant districtuala dalla Surselva.
- **16 entochen ils 31 d'uost:** Teater el liber «Sut igl ischi», nov produziuns sil prau sut la baselgia parochiala.
- **15 da settember:** 100 onns curtgin d'honor, honoraziun da sis personalitads romontschas el curtgin d'honor.
- **Duront igl entir temps:** Exposiziun davart la historia dalla Ligia Grischa sco era in'exposiziun d'art cul tetel «grisch» el Museum sursilvan Cuort Ligia Grischa.
- **3 da november:** Finissascha dil giubileum el Museum Cuort Ligia Grischa a Trun.